

## A ÑUCAMA SINANXUN CA AXA ANU TIMĚCĚ UNICAMAN ĘSAQUIN CAXA:

### A PAIN SINANCĚ BANA

CAMAXUNBI CA 'UNANIA: Camabi uni ca bĕtsibĕ sĕnĕn 'icĕ quixun camaxunbi 'unancĕ 'aish ca camabi uni, uni itsin racueocema 'janan cĕmei ami mananquin 'atimocĕna 'aish chĆamarua bucuti 'icĕn.

CAMAXUNBI CA 'UNANIA: Camabi uni ca bĕtsibĕ sĕnĕn 'icĕ quixun sinanti 'ainbi ca an usaquin sinancĕma unicaman an sinancĕx a meu 'icĕ uni 'aisamaira tĕmĕramianan paĕ tanmiquin 'atimoia, uni ra'iri usoquin uni 'ati ca 'aisama 'icĕ quicĕbĕtanbi. Usaquin bĕtsi un' 'ati cuĕĕnima ca camabi uni ĕsai iti 'icĕn: ańu ņu ņui cara banaia a cup' ub'ocĕma it', 'ianan ańu ņu cara sinania a cup' ub'ocĕma 'iti, 'ianan ańu cara pisa tania pianan ain cuĕĕncĕ ņu bianan uinu cara 'isa tania anu 'iabi ca bĕtsi un' unin racuĕotima icĕn.

CAMAXUNBI CA 'UNANIA: Gobiernocaman uni upitax bucunun quixun bana mĕniocĕma 'ain tĕmĕraquin ca unicaman mas' nuituquin ain 'apumib' nishi 'acananti sinanti 'icĕn.

CAMAXUNBI CA 'UNANIA: Camabi netenu 'icĕ unicama ub'ocĕma 'aish chĆamarua 'inun ca camabi nĕtĕnu 'icĕ gobiernobĕ ain unicamaribi bĕtsi gobierno 'imainun ain unicamabĕ nishananima up' iti 'icĕn.

CAMAXUNBI CA 'UNANIA: Gobiernocaman xucĕx timĕcĕ unicaman ca up'ima ņu 'acĕma 'aish ca camabi uni bĕtsibĕ sĕnĕn 'aish ubionancĕma upiti it' icĕ quixun sinanquin camabi uni usai 'inun 'aquin' camaxbi 'i'asamaira oi upiti bucunun.

CAMAXUNBI CA 'UNANIA: Gobiernocamanribi ca caxa, camabi 'apun anĕcĕ unicaman sinancĕsaribi oquin cananuna nunribi sinanin. Usaxun cananuna atubĕtan at' un sinancĕsabi oi nun nĕtĕnu 'icĕ unicama 'atima ņu 'acĕma 'aish upiti bucunun 'aquinti 'ain.

CAMAXUNBI CA 'UNANIA: Camabi unicama ub'ocĕma upiti bucunun ca camaxunbi pain ĕnĕ banacama unanquin sinanti 'icĕn.

Gobiernocaman xucëx timëcë unicaman ca ësaquin caxa:

A ÑUCAMA SINANXUN CA AXA ANU TIMËCË UNICAMAN ËSAQUIN CAXA:

Camabi nëtënu 'icë unicaman: ësai 'iti 'aish ca camabi uni upiti bucutí ice quixun sinanquin ca ënë quiricanua ñuicë banacama manutimoquin sinánan an ënë bana 'unancëma unicamanribi upí oquin 'unánun 'unanmití 'icën. Camabi gobiernonën ca ain nëtënu icë unicaman ënë banacama upí oquin 'unánun 'aquinti 'icën. Camabi nëtënu 'icë unicaman ënë banacama upí oquin 'unánun ca gobiernocama bëtsi gobiernobë 'aquiananti 'icën.

1.

Ui uni cara 'iti icë axbi ca bëtsi unibë gobiernonën iscëx sënën ití icën. Ui cara ain tita ain papa 'iaxa quixun sinanquinma ca gobiernonën sinancëx ax bëtsibë sënën 'icën. Camaxunbi ca sinanti 'unanin. Camaxunbi ca añu ñu ati cara asábi 'icën, añu ñu 'ati cara 'aisama 'icë quixun 'unanti 'icën. Usa 'ain ca camaxbi ain xucënbë 'icësaribiti nuiananti 'icën.

2.

Uinu 'icë ëmanu 'icë uni cara ax 'icë, ui unin aintsi cara ax 'icë, ax cara xanu 'icë, ax cara nucë bënë 'icë, uisa banan cara banaia. Nucën Papa Diosmi cara sinania, ami sinanima añu ñubi rabi cara sinania, ui unicamax cara 'apu 'iti ice quixun sinania, añu ñu cara sinania, uisai cara ain papa ain tita 'ia, ñuñu cara ax 'icë, ñuñuma cara, usa ñucama sinanquinma ca gobiernonën camabi uni ñu 'atima 'acëma 'aish ca bëtsi unibë sënën icë quixun sinanti 'icën. Uisa cara ain nete icë, a nëtë cupí ca uni 'atimocë 'itima 'icën.

3.

Ui unibi ca bëtsi unin bamamiti sinantima 'icën. Ca chiquítimoi sipuacë 'itima 'icën. Ca 'atimocë 'itima 'icën.

4.

Uinu 'icë unixbi ca chiquitimoquin marucë 'itima 'icën. Uni chiquitimoquin maruxun 'ibuati 'aíma ití 'icën.

5.

Uinu ice unibi ca 'aisamaira oquin uni itsin paë tanmitima 'icën. Bëtsi uni ami nishquin paë tanmiquin 'atimocë a ca 'itima 'icën. Ñuina 'acësa oquin 'atimocë ca uni 'itima 'icën.

6.

Uinu 'icë uníxa uinu cara 'ia a ca anu 'icë gobiernonën uni itsi 'acësaribi oquin sinanti 'icën, ax bëtsi unisaribi 'icë cupí.

7.

Uinu ice unibi, ami uni itsin upima sinanquin paránan 'atimonunma ca gobiernonën 'aquintí 'icën. Enë banacama sinanquinma ain cuëencës a oquin unin uní itsi atimoi ami 'ësënanunma ca gobiernonën bërúati 'icën.

8.

Uni ñu 'atima 'acëma 'icëbi uni itsin 'atimocë 'ixun ca a unin an uni bana mënioxuncë 'apu cati 'icën. Cacëxun ca mënioití 'icën, gobiernonën cacësabi oquin.

9.

Uinu 'icë unixbi ca añubi 'uchacëma 'icëbi bëtsi uni ain cuëencësa oquin sipuacë 'itima 'icën. Sipunu 'icë ca anubi 'inun ëntima 'icën. Ain menua ca bëtsi menu cuantanun xutima 'icën.

10.

Unin uisa ñu 'acë 'icëa bëtsi uni a 'aisamonun quixun ami mananquin cacëxun ca an bana mëniocë 'apun bëtsi uni manancë a unin banaribi asërabí cara usa 'icë quixun 'unantí 'icën, uni raírinënribi ismainun. Upí oquin istancëxuinshi ca cati 'icën, uisa cara a uní otí ice quixun, gobiernonën ain quiricanu mëníosabi oquin.

## 11.

1. Uinu 'icë uni cara uni itsin ami manania, a ca an bana mëniocë 'apun pain upí oquin sinantí 'icën, sapi ca ñu 'atima 'acëma 'icë quixun. Gobiernonën cacësabi oquin pain ca isti 'icën uisa ñucama cara 'axa quixun. Uni rairinën ismainun ca axa ami manancë unicaman bana cuanan amia manancancë a unin banaribi cuanan an a uni unancë unin banaribi cuatí 'icën. Cuaxuinshi ca aséribi uisa cara a uni 'iaxa quixun upí oquin 'unantí 'icën.
2. Uisai cara gobiernonën bana quia usoquinshi ca an bana menioce 'apun a 'uchacë uni aséribi ain ñu 'atima 'acë istancëxun uisa cara otí ice usoquin 'atí 'icën. Anun a ñu 'aisama 'acë nëtë ain fecha isquin ca an bana mëniocë 'apun a fecha gobierno quicë bana bëtisoima a bana quicësabi oquinshi axa 'uchacë uní atí icën.

## 12.

Uinu 'icë uninbi ca ain cuëëncësa oquinshi bëtsi uni 'imainun ain xanu 'imainun ain bëchicë ubiotima 'icën, ain xubunu ca atsintima 'icën, ain quirica bëtsi unin bëmicë 'imainun quirica an buanmicë ca rairinën bitima 'icën. Usa 'ain ca uinu ice unixbi, a unix ca 'aisama icë quixun uni rairi sinanmi 'atimati banatima 'icën. Usai banacëbëtanbi an bana menioce apun gobiernonën cacësabi oquin meniotí 'icën.

## 13.

1. Uinu cara uni cuainsa tania, anu ca cuantí 'icën; ain nëtënu 'aisch uinu cara tsotisa tania ca uni anu tsoti 'icën.

2. Ui unix cara ain nētēnuax nētē itsinu cuainsa tania ax ca cuanti 'icēn.  
Amanu 'itancēx ain nētēnu utēcēinsa tani ca uti 'icēn.

#### 14.

1. Uix cara ain nētēnuxun bētsi bētsi ocē 'ia ax ca tēmēranuxma bētsi nētēnu cuainsa tani cuanti 'icēn.
2. Ain ñu 'atima 'acē cupí gobiernonēn mēnioquin 'atimocē usa uni ca ain nētēnuax tēmēratí rabanan bētsi nētēnu quantima 'icēn.

#### 15.

1. Camabi uni ca ain netenu ití icēn.
2. Enē nētē minan 'aishbi ca minanma 'iti 'icē quixun ca unin bētsi uni catima 'icēn. Bētsi nētēnu 'isa tanquin ca unin usai 'inuxun gobiernobētan mēniotí 'icēn.

#### 16.

1. Bētsi bētsi unix ca quia: Uni canice ixunbi ca bētsi netenu icē xanu bitima 'icēn, ca bētsi banan banacē xanu bitima 'icēn, ca an rabicē dios rabicēma xanu bitima 'icēn. Usa unix quicēsai ca 'itima 'icēn. Unin usa xanu canicē 'icē bisa tanquin ca bití 'icēn, a xanu cuēēncēbētan. Atux 'isa tani ca bēchicēñu 'ití 'icēn. Gobiernonēn iscēx ca a uni ain xanubē sēnēn 'icēn, xēnibua 'ainbi.
2. Nucē bēnē cuēēnquinshi ca xanu biti 'icēn, a anúribi cuēēnia ca bití 'icēn.
3. Tuácama ain tita ain papabē 'aquiananti ca asábi 'icēn. Usai upiti bucunun ca camabi unin sinantí 'icēn. 'Apunribi ca usai 'inun sinanxunquin 'aquintí 'icēn.

#### 17.

1. Uni meñu 'isa tania ca uni itsin meñu 'inun ënti 'icën. Xuburibi 'imainun añu ñuñu cara uni 'isa tania ca uni itsin a ñuñu 'inun ënti 'icën. 'Aisa tanquin uni rairibëtan mëníotancex ca a ñu ainainshima, rairinanribi 'iti 'icën.
2. Unin ca ain cuëëncësa oquinshi bëtsi unin ñu bitima 'icën.

## 18.

Camabi unin ca ain cuëëncësa oquin sinanti 'icën; uni rairinën ubiócëma ca 'ití 'icën. Uisoquin cara ain dios rabitisa tania usoquin ca 'ati 'icën. Usaquin sinanxunbi ca amiribishi 'aisa tanquin sinantécentí 'icën; uni rairinén ubiócëma ca 'ití 'icën. En rabicë diosan iscëx ca bëtsi bëtsi ñu 'ati 'aisama 'icë quixun sinancë uni ca bëtsi unin a ain cuëëncësabi oquin 'anun ënti 'icën. Usa ain ca ain diosmi catamëisa tania bëtsi unin a 'axunma 'anun catima 'icën. An rabicë dios ca anbi rabití 'icën. 'Aisa tani ca uni rairibë timëquin abëtan rabiti 'icën. Rabiquin ca 'aisa tanquin rairi uniribi ain dios ñuiquin 'unanmití 'icën.

## 19.

Camabi unin ca ain cuëëncësa oquin sinanti 'icën. Ca ubiócëma 'iti icën. Ca bëtsi unin cacë bana 'aisa tanquin sinanti 'icën. Bëtsi nëtënu 'icë unibëribi ca 'unanmiananti 'icën. Usai 'i ca ubiócëma iti 'icën. Usaribi oi ca ain sinancë ñu ñui banatisa tani banati 'icën; ca ubiócëma 'iti 'icën.

## 20.

1. Uni rairibë timçtisa tani ca uni upí oquiinschi sinanx timetí 'icën.
2. Uinu 'icë uninbi ca bëtsi unin abëtan ñu 'aisama tania ubioxun ñu 'amitima 'icën.

## 21.

1. Camabi unin ca libreta electoralñu 'ixun ain cuëëncësa oquin 'apu caisquin votación 'atí 'icën.

2. Gobiernonën ain nētēnu 'icē unicama 'aquinun mēniocē ñucama ca camabi uninan 'icēn. Ca esa 'icēn: Bai cha anun ca carrocama 'imainun unicama cuainsa tani cuanti 'icēn. Anun quirica buanmiti correo anun ca unin 'aisa tanquin ain quirica buanmiti 'icēn. Usai ca 'iti 'icēn.
3. Uisa gobierno cara a nētēnu 'icē unicama cuēēnia, usa ca ain gobierno 'iti 'icēn. Uisa gobierno cara a unicama cuēēnia 'unánun ca libreta electoralñu 'icē unicaman quiricanu cuēñeoquin uicama cara ain 'apu 'iti cuēēnia quixun 'unánun 'ati 'icēn. Camabi uni ain sinancēsabi oquin ca uix 'apu 'iti cara cuēēnia, ain anē quiricanu cueneotí icēn. Cuēñeocē ca uni itsin 'unantima 'icēn, anbi cuēñeocē ca ití 'icēn. Camabi uni ca bētsibē sēnēn 'icēn. Usa 'aish ca camabi uni gobierno quicēsabi ol libreta electoralñu 'iti 'icēn.

## 22.

An ñu 'atima 'acēma 'aish ca uinu 'icē unixbi rabinima bētsi uni 'icēsai ñu meetinu ianan uni rairibē nuianancē 'ianan ain rairinēn ñu 'acē 'icēsaribi oi 'isa tani iti 'icēn. Uní usai 'icēma 'aish tēmērala ca uni itsin 'aquinti 'icēn, ain 'apunribi mēniocēsabi oi ca 'aquince ití icēn. Uni ain nētēnuax cara uisa ñu cara 'icēbē tēnmēria ca bētsi nētēnu 'icē gobiernonēnribi 'aquinsa tanquin 'aquinti 'icēn.

## 23.

1. Camabi unin ñu mēētisa tanquin ca ñu meetí 'icēn. Añu ñu mēēti cara 'aisa tania a ñu mēēti mēraquin ca 'ati 'icēn. An ñu mēēmicē unin ca ain uni 'atimotima 'icēn. Ñu mēēti 'alma 'ain ca 'apun ñu mēēti mēranun 'aquintí 'icēn.
2. Ui uni cara, uisa cara ain bana 'icē, camabi uni ca sēnen 'icēn. Usa 'ixun ca upí oquin ñu meece 'ixun bētsi unin 'acēsaribi oquin ain cupí biti 'icēn.
3. Ui unin bētsi uni ñu mēēxuncē 'ixun ca ain cupí biti 'icēn, a 'imainun ain xanu 'imainun ain bēcicēcama upiti bucunun. Ain cupí 'itsamashi bicē 'aish 'aquinsa 'icē ca apun anun a 'aquinti mēníoti 'icēn.

4. An ñu mëécë uni raíri unibë timëquin bëtsibë bëtsibë aquiananisa tanquin, ulsoquin cara ain ñu mëëti 'ati 'icë quixun sinánan uisa cara ain ñu meetí icë quixun acama sinánux timëtia ca uni itsin usaquin anun enti icën.

## 24.

Camaxbi ñu mëëtancëx tantiti ca asábi 'icën. 'Uráinra tantiquinma ñu mëëtancëx ca tantití 'icën. Anun tantiti nëtë gobiernonën mënlocësabi oquin ca unin ñu mëëquinmabi ain cupí biti 'icën.

## 25.

1. Camabi uni 'imainun ain xanu 'imainun ain bëchicëcama ësai 'iti ca asábi "icën: 'insincëma chuámarua, pitiñu, chupañu, anu itinu, insincë 'aish roñu 'iti. Uni ain ñu meetí 'alma, uni insince, uni bëtsicë, xanu casunamëcë, uni xëni acama anun upiti 'iti 'alma 'ain, ain aintsin 'aquiniama ca a 'aquinti 'apun mëniotí 'icën.
2. Tuáñu xanucama 'imainun tuácamaribí upití inun ca 'aquincë ití icën. Bëtsi tuácama 'icësaribitia 'inun ca unin xanumi sęcë' ocë tuácama bërúance ití icën.

## 26.

1. Camabi tuá ca escuelanu atsintisa tani atsinti 'icën. Cuploquinma ca primaria 'ati pain atsinti 'icën. Camabi tuáratsu ca escuelanu cuanti 'icën. Ui unicama cara escuela tęcnica anu atsintisa tania ca anu cuanti 'icën, apun mëníosabi oi. Secundaria cëñutancëxun bëtsi ñuribi unantisa tani ca bëtsi escuelanuribi atsinti 'icën, ain nota asábi ain.
2. Escuelanuxun ca quiricanu cuënëocë ñuishi 'unanmicëma 'iti 'icën. Anuxun ca alumnocama bëtsi ñu 'atiribi 'unanmicë ití 'icën, 'imainun ca upí oquian alumnonën sinanti aribi 'unanmicë 'iti 'icën. Bëtsi menu 'icë unicama 'imainun bëtsi banan banacë unicama 'imainun Nucën Papa



Diosmi sinancë unicama 'imainun ami sinancëma unicama, camabi nusaribi uni 'aish unibë nuibananti ca 'unanmicë 'iti 'icën. Usaquin sinanmicëx ca gobiernocaman xucë unicama timëxun cuëëncësabi oi unicama bëtsibë nishanani 'acananti 'aima ití icën.

3. Bëtsi unin cacësamaira oquin ca ain titabëtan ain papan cati 'icën, uisa escuelanuxuinra cara ain bëchicënën ñu 'unanti ice quixun.

## 27.

1. A ëmanu 'icë unicaman 'acësa oquin ca anu 'icë uni rairinën 'aisa tanquin usaribi oquin 'ati 'icën. A ëmanu 'icë unicaman sinancësa oquin ca anu 'icë uni rairinën 'aisa tanquin usaribi oquin sinanti 'icën, camaxunbi ñu 'ati upí oquin 'unánan upiti bucunun.
2. An ñu 'acë úní 'imainun an ñu cuënëocë uni anpan 'acë 'ain ca bëtsi unix, en 'acë ca quiax quitima 'icën. Usai bëtsi unix quiti rabanan ca an ñu 'acë unin 'aisa tanquin an 'acë ñu a 'apu 'unanmiti 'icën.

## 28.

Enë quiricacama quicësabi oi camabi uni uni itsin ublocëma upiti bucuti 'inun ca camabi nëtënu icë unin ain aintsi 'aquinti 'icën.

## 29.

1. Camabi únin ca ain ëmanu 'icë unicama 'imainun a 'urama 'icë ain caibucama 'aquianan atubëtan ain ëma 'imainun mecama upí imití icën. Usaquin 'ai cuni ca unix masá sinancëma 'aish upiti 'ití 'icën.
2. Unix ublocë 'aish upiti bucucëma 'imainun unin ñu 'atima 'aquin uni itsiribi ñu 'atima 'amiti 'imainun bëtsi bëtsi ñu sinanquin uni raíri tsuáquirumiti usai 'iti rabanan ca gobiernonën ain unicaman cuati bana mëníoia. Usa oquin mënlocë banacama ca ain unicaman cuati 'icën.

3. Gobiernocaman xucëx timꞥcë unicaman upí oquin sinanquin ca ënë banacama cuënëoxa. Usaribi oquin ca camabi unin ënë bana isquin, usaquin sinanquin 'acë ca enex ice quixun upí oquin sinanti 'icën. An 'acë unicaman sinancë bana ca bëtsiotima 'icën.

**30.**

Enë banacama bëtsioquin ca uinu 'icë uninbi uni raíricama upiti bucunun quixun sinanquinma, 'ëx cuëëncësa oquin 'anun ca a bana quia quixun sinantima 'icën. Uni raíri bëtsi unibë timëcëcama 'imainun gobiernonu ice apucamanribi ca usa oquin sinantima icën.